



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :



Tir Yimyim



tirymyim@aolima



tir yimyim

TAPAK 10

**Myanmar refugee tem nem
tejenokdak agütsütsüji onok mapa**

**Y Patton-i 36buba
PDSA Meet lapoktsü**

VOL. XVIII NO. 159 (ADOK 159) DIMAPUR

RASEMNÜ (WEDNESDAY)

METSÜREMI (MARCH) 24, 2021

₹ 5.00

Dimapur arrtsülen Peren district nung curfew benoker

Dimapur, Metsüremi/March 23 (TYO): Lamhainamti yimtsüing nung March 22, 2021 nü ki-o-jen raksaja nisung takum laluba ajanga anasa aliba tesemtem nung tensa mejungi akumba mechi aser mangatetep aliba tesem nung tensa mejungi akumba nung ajemdaker, Criminal Procedure Code (CrPC) 1973 kübok Section 144 benok nung dang tarutsü nung lendong timtem tali mataloktsü aser asüama majurutsü ta angateta, ni, Sentiwapang Aier, District Magistrate ajanga CrPC 1973 indang Section 144 kübok künem tashi agüja aliba amshia, mangatetep aliba tesem nung nisung pongu dak tema adenshiba aser Mhainamtsi (Kohima-Dimapur) Junction nungi Mhainamtsi Police Check gate tsütsü Dimapur district den arrtsüa Heningkungwla Police Check gate tashinung nok-o-nü bener jajaba/senzüba nokdanger, ta sangdong ka ajanga ashi.

Iba totuyuba ya March 23, 2021 aonung 9:00 ako nungi tarutsü nung totuyuba ka magütsü tashi amshia alitsü, ta kasa sangdong ajangasa metetdaksü.

Maneni, March 22 nü Dimapur aser Peren arrtsü nung mangatetep adoka kiojen raksaba den nisung asüba osang angazükba sülen Dimapur Commissioner of Police Rithihu Tetseo, IPS-i sangdong kanga ajanga, iba tesem nung 144 Cr. PC benokba metetdaksü.

Tensa mejungi kümer aliba azüoktsü atema jenjang tapet agitsüsa kümogo anungji Nagaland sorkari temelaba agütsür aliba dak ajemdaker Vihuto, Khehoyi aser Kiyevi yimtsüing temeket nung 144 Cr. PC (code of Criminal Procedure, 1973) (2 of 1974) kübok nisung pongu dak tema adenshitsü, sung, nok, nü, lijak mesera tanga hadir kecha bener senzütsü asoshi memelar, ta Police Commissioner-isa metetdaksü.

Anogo 10 tashi Nagaland nung shinga dak Covid-19 meputet

Kohima, March 23 (TYO): Nagaland nung tesüiba anogo 10 tashi nisung shinga dak coronavirus tashidak meputet; aser tang tashi nung state nung nisung ajak agi 12,225 dak iba tashidak putetogo, ta Mongolbarnü health ketdangsertemi metetdaksü.

"Tanü coronavirus positive shinga dak meputet aser shinga manep," ta state Health Minister, S Pangnyu Phom-i twitter ajanga metetdaksü.

State nung coronavirus caseload 12,225 nungjagi anepertem 11,978 lir, aser iba tashidak agi shirangertem anepbaji shilem 97.98 lir, ta Health & Family Welfare Director, Dr. Denis Hangsing-i metetdaksü.

Tang iba tashidak agi teshirangdakpur nisung ana dang lir, aser iba shilemji 0.02 dang lir, ta pai ashi.

Comorbidities keta alir nisung ter densema nisung ajak agi 91 süogo aser nisung 154 bo tanga state temi ogo, ta pai ashi.

Tang teshirangdakpur ka Kohima nung lir aser pa dak iba tashidak temaitsübo mali, aser ka

Mokokchung nung lir (temaitsü tera keta lir), ta pai ashi.

Tang tashi nung Nagaland nung nisung 1,35,304 dak COVID-19 samples tendangogo, item rongnung RT-PCR test 75,321, TrueNat 37,500 aser Rapid Antigen Test tendangba 22,483 densema lir.

Ano külen Kohima nung Chief Secretary, J. Alam menden ser Covid-19 State Task Force senden mena linük aser state nung COVID-19 tensa dak sendakba onüktem nung o lemtepogo, ta Health & Family Welfare Department Principal Director, Dr Kevichusa Medikhru-i metetdaksü.

Task Force-i tang aliba SOPs reprangshi, Testing & Surveillance aser COVID-19 Vaccination mapatong asadanga liasü.

Iba wara anema raraba nung nüburtemi maneni nungita yaritsüla ta shia pai, linük nung iba tashidak agi nisung asüba tajemtiba state tem rongnung asen state densema lir, ajisüaka tang ama tongtiband mapang ka nung asenok temelung sür malitsüla, ta ashi.

Ex-Minister S.I. Jamir kinungtsü alima nungi pilaogo

Dimapur, March 23 (TYO): Taoba Nagaland Minister S.I. Jamir kinungtsü Temjentula, mapang talangka shiranga arur Mongulbar nikongdang alima nungi pilaogo.

La Eden Hospital, Dimapur nung anepalua lia arishi tembang.

La arishi küm 74 liasü.

Asür Temjentula-i lai kinungbo den tanur trok yutsür iba lima nungi pila ogo. La den asüpila sentep sentongji asüing (Bodbar) anügdang 12:00 ako nung Darogapathar nung lar kidang agitsü.

Naga yimten ken o nung Gol-i temolung agütsütsüla: GPRN/NSCN

Dimapur, Metsüremi/March 23 (TYO): Government of India (GoI) ajanga Naga yimten tebilemtsü ya ken o agi aginüba yimya nung ketdang mesütetra, aser Shillong Accord mesüra 16 Point Agreement yimya nung Naga nunger yimten tebilemtsü tamendak dak tashi meiti kumdaktsüra iba ken o ya Khodao Yanthan, Gen. Retd. Khole Konyak, Isak Chishi Swu, NSCN Chairman Q. Tuccu, Th. Muivah mesüra Tongmeth Wangnao dak matemtsü, ta GPRN/NSCN ajanga sangdong ka nung metetdaksü.

Iba aibelen ana yagi Naga nunger yimtenren tsütsü azüdokshi jenti ajangshiogo. Meteta alitsü kaji, GoI ajanga Naga nunger tebilemtsü ya Framework Agreement nungi pilaa oa bilemer aser puti otsü indang kasa nung maneni aibelener, aser Naga nunger yimten ken o maneni aotsü.

Naga nunger lenirtem melenjen melentsü, saka ajaki akhumsübuwa agizüktettsüsa tangatetep kati maru tashi iba ken

o tarongba kodanga mesamatsü, ta parnoki ashi.

16 Point Agreement aser Shillong Accord ama tesüiba mapang tezüngzüktep yangluba ajanga Indo-Naga ken o tangatetep kati marutetba ajanga Framework Agreement ya renem.

Government of India-i temolung agüja süoki ia tezüngzüktep indang tanüla aser tangatetba nung Framework Agreement nung aliba ama inyaktsü asoshi NSCN aser Naga nungeri küm pongu dak tema ataogo. Saka mapang süitema aoba ajanga GoI ya Framework Agreement dang nungi kanga agi tajemba jenjang nung langka kar lir, ta sayur.

Iba ya ajanga ano maneni timtem atsülangshitsü, kechiaser Naga nunger nem Tsüngremi agütsüba yimtenren temeden kecha dena memelenteptsü. Indo-Naga yimtenren ken o küm 20 dak tema jembia arudang iba ama aibelen indang bilemdangtsü ya kanga tesempatsü mapa ka asütsü, ta sangdong ajanga ashi.

Nüjiso bushiba tali taretba kumdaktsütsü asoshi shisatsü agütsütsü NSCN anünga mali. Science, medical, engineering, information technology amala nung degree tem bener tetemtsü nübu nüngjang petinu ama lir.

Kasaji tensa melenshia aoba den lirumedema military leadership ketdangsütsü asoshia bendanga agütsür inyakba lenirtem lir. Saka sepai tashi amshitsü ya onoki kodanga mebilemdang, kechiaser yimtenren tebilemtsü asoshi yimtenren tangatetep dang nüngdaker. Aser iba tetetzü 1997 ceasefire aser küm ter dak tema Indo-Naga yimtenren ken o jembishinüba ya lir.

Ajisüaka Government of India ajanga Naga nunger ken o tatem kati arutsü asoshi pari aginüba ama Framework Agreement metetsümonga meshidaki meyipzüka amshir. Iba ya NSCN aser talisa Naga nunger tangatetba anema inyaker asütsü, shirnoki Nagalim nung aser South-east Asia nung teti asoshi yimjung aginüa lir, ta ashi.

PCI Sub-Committee-i osangbenertem den shisa lemsatep

Kohima, March 23 (TYO): March 22, 2021 nü Hotel Japfu, Kohima nung Directorate of Information & Public Relations-i ayongzüka Press Council Of India Sub-Committee aser osangbenertem den senden ka menogo; raraba tesemtem nung osang bendenba dak sendakba nung Media & Security Forces atema guidelines yanglushitsü aser North East States, Maoists telungpurtemi timtem agütsüba tesemtem aser Jammu & Kashmir nung sentongtem ayongzüka agitsü atema senden nung jembia liasü, ta ketdangsertem osang ka ajanga metetdaksü.

Osangbenertem den jembidang PCI Sub-Committee züngsem, Jaishankar Gupta-i, rara aliba tesemtem nung osangbenertemi timtem aika ajurur, states pusemba mesüra shinga pu mesemi tiyongtsü nung ocet zülutsü atema timtem ajurur, ta ashi.

Paisa, state tesem ajaklen osangbenertemi pei mapa junga meinyakteter, aser ibaji lokti tentet balala, melungtet teloktem aser tanga telok balalai rongshiba ajanga lir, ta ashi.

Osangbenertem den iba senden ayongzüka shisa lemsatepba nükjidong ya osangbenertemi pei mapa nung timtem balala ajangshiba sadok-sadoka lemsateptsü atema lir, ta

pai ashi.

Tesasaba olen ka nung pai, tanü tashi osangbenertem sendoka yutsür, kechiyong tang tashi nung state kar nung dang osangbenertem atema welfare schemes benoka inyaker, ta ashi.

Paisa DIPR-i accredited journalist nem welfare scheme agütsüba atema pelar, ta lemsatep.

Nagaland Press Association Tir, H Chishi-i, tanü osangbenertemi kong nokdaktsüar memetet, kechiyong osangbenertemji telok kari azüoker, ta ashi.

"Shidaktemji tai aser taitemji shidak kümogo. Alimai India nunger media ashishitsüsa lir, aser ibaji Jammu & Kashmir nung kiralongra dak sendakba onüktem ajanga masü saka tanga onük aika ajanga lir,

PCI Sub-Committee ajanga Chief Minister ajuru

Dimapur, Metsüremi/March 23 (TYO): Press Council of India Sub-Committee ajanga Nagaland Chief Minister, Neiphiu Rio den March 23, 2021 nü pa aliba kidang ajurua sensaksem kaa liasü.

Sub-Committee ajanga Chief Minister dang parnoki state semdangba nükjidong indang lemsatep aser linük nung, talisa mangatetep aliba tesemtem nung osangbener aser media person temi timtem balala ajangshiba indang lemsatepa liasü.

Chief Minister-ia Sub-Committee dang stat nung tang ajangshia aliba tebilemtsü balala indang lemsatepa liasü.

Danga state tem den medemdangra Nagaland nung osangbenertem jenjang tajungba lir, ta CM-isa ashi.

Osangbenertem ajangzüksü asoshi state sorkari mera balala agiba indang Rio-i Sub-Committee den lemsatepa liasü.

Iba senden nung Chief Secretary, Jan E Alam dena liasü.

SMC/SMDC district & block resource person training sentongagi



Kohima, Metsüremi/March 23 (TYO): SMC/SMDC district aser block resource persons atema state level training sentong tanü Nagaland Education Mission Society, Samagra Shiksha Nagaland tawabangba kübok Capital Convention Centre nung tenzüko. Iba sentong ya anogo ana agitsü.

Training lapokba sentong nung Special Secretary to the Government of Nagaland, School Education & SCERT Kevileno Angami-i, human resource development terenlok lenmang shidaki anitsü nüngdakba dak rangloker jembi.

"Asenok ket nung infrastructure tajungtiba, developed infrastructure liaka human resources aser nüburtem lenmang shidaki manira terenlok ajak amajok asütsü," ta lai ashi.

Laisa, state nung education jenjang ajungkettsü atema tesendaktep aser tongtepratep shidak alitsüla ta shia school education department, Samagra Shiksha, nüburtem aser lokti tentet balalai tanurtem anitetsü aser human resource terenlok asoshi tejak dangi arua khuret abentsüla, ta ashi.

Kelhikha Kenye Deputy Mission Director Samagra Shiksha, Nagaland-i ojembiba mapang, education nung efficiency, transparency, accountability and responsiveness of services

ajungkettsü nükjidong nung education decentralize asü ta ashi.

Decentralized education ya tetangshiba asütsüla, local tenügdakba sayutsüla, lokti nem shilem agidaksütsü ajumesotsüla aser meylongi education jenjang tajungba kümdaksütsüla, ta pai ashiba den education decentralize asüba nükjidongji lokti lenirtem nem education achaayangba nung shilem agidaksütsü aser education nung lokti shilem agidaksütsü asoshi lir, ta ashi.

Nagaland nung 2002 küm Communitisation of Public Institutions and Services Act benokogo. Iba act ajanga instiution atema sentong yangluba aser achaayangba nung shilem agia lokti nem tajangzük agütsütsü atema lokti nem parnoki indang institutions achaayangtsü asoshi tashi agütsür, ta pai ashi.

Iba act benokba nükjidong tongtetsü atema tanü asenoki asen lokti lenirtem nem tangazükba agütsütsüla aser parnok khuret angatetdaksüla, ta pai ashi.

Right to Education Act 2009 kübok lokti lenirtem-School Management Committee züngsemtemi education jenjang ajungkettsü atema school achaayangba nung tongtibang shilem agitsü nüngdaker, ta pai ashi.

Maneni Kenye-i ashiba agi, SMC/SMDC District/Block

Resource Persons atema State Level Training agiba ya lokti lenirtem nem parnok shilem aser khuret tali angatetdaksütsü atema District/Block level nung nung SMC/SMDC züngsemtem nem tangazükba agütsütsü asoshi ayongzükba agir.

District/Block Resource Persons state level training tembangba sülen parnoki state ajunga nung SMC/SMDC züngsemtem nem tangazükba agütsütsü. Anogo ana training agiba mapang school tem nung kaketshirtem timba züngoksemba nung SMC/SMDC shilem aser khuret, Out of School Children (OOSC) tem jangjaba, Children With Special Needs (CWSN), school tem nung Mid-Day Meals tajungba agütsütsü atema, School Safety Programs benoktsü, School Development Plan renemtsü, School Disaster Management Plan, quarterly senden ayongtsü aser education nung lokti-i shilem agidaksütsü atema tangazükba agütsütsü asoshi rangloker inyaktü.

District/Block Resource person (DMA Officials, EBRC Coordinators and TOTS) shirnok iba sentong nung training agir parnoki kasa ya sorkar school 1990 nung sayutsü.

Iba sentong ya by Liyalo Apon, Deputy Mission Director Samagra Shiksha Nagaland lenisüba kübok agia liasü.



Tanü March 23 nü Dimapur nung nungtugu kaket zülur, Wt. Tiala Imchen-i la Holyland & Europe Tour aoba documentary film DVD ka, Tir Yimyim Yimozülur Shri. K. Temjen Jamir-i sayatsüba sülen Rev. Dr. T. Alemeren aser kinungtsü nati Tiala Imchen mapa aser taküm atema sarasademtsüba noksa nung angur. Iba sentong ya DABA Duncan Fellowship Sunday school Worship Hall nung agia liasü. Iba Holyland & Europe Tour documentary film DVD ya Ao aser English nung adoka lir. Taginuri mobile phone number 9856072258 ajanga tongteprateptsü akok.

Press Council of India Sub Committee-i police ketdangsürtem ajuru

Dimapur, Metsüremi/March 23 (TYO): Press Council of India Sub Committee, shirnok mangatettep adokba mapang osang bendenba dak sendakba nung Media aser Security Forces atema guidelines yangluba aser North East State tem, Naxal agi kongshir aliba tesemtem aser J&K nung sentong balala ayongzükba agitsü aliba dak sendak lir, parnoki March 23 nü DGP Nagaland, T. John Longkumer, IPS aser tanga police ketdangsür tejentem den PHQ Kohima nung ajurutepogo.


Convenor, Jaishankar Gupta lenisüba kübok züngsem Kamal Nain Narang aser Pradeep Kumar nung state nung police

ketdangsür tejentem den media achaayangba aser mangatettep adoker aliba tesemtem nungi osang yokba dak sendakba nung mapang talangka agia sensaksemogo.

Sensaksem mapang Sub Committee Convenor, Jaishankar Gupta-i, state kübok kinük nung aliba tesemtem nungia dena mangatettep adokba indang kuli tejangja agi nongitba osang nüngdakba lemsatep aser media nem osang tejangja agütsütsü atema security forces tinyaktsü indang lemsatepa liasü. Paisa, media nem osang agütsütsü atema in-charge ama Nodal Officer ka alitsü nüngdaker ta ashi.

(Maneni tapak 9 nung...)

Kohima nung World Optometry Day mungogo



Dimapur, Metsüremi/March 23 (TYO): Nagaland Optometry Association ajanga ayongzükba, Directorate of School Education nung March 23, 2021 nü "Training of School Teachers on Vision checking" omen nung ajemdaker World Optometry Day mungogo.

Iba World Optometry Day ya Nagaland nungbo tang mezüngbuba amunger alitsü, kong Principal Director, School Education Nagaland, Shanavas C den kaket reju balala nungi tesayurtem dena liasü.

Sentong nung jembiba mapang, Nagaland Optometric Association ajanga shilem tulu agiba atema Principal Director-i pelaba lemsatep aser optometrists indang awareness tali agütsütsü asoshi sentong balala ayongzükba agitsü aser tenük majung alir nem teyari agütsütsü ajungshia liasü.

Paisa ashiba agi, accommodation aser convergence timtem aliba kaketshirtem azüngba yimya tajungba kümdaksütsü asoshi tenük atema vision training agütsütsüla.

Pai tesayurtem dang pei school-i meyipa aoba sülen iba anogomung nung ajangshibatem lemsateptsü ashi aser tarutsü nung department-ia pilot project kar yanglutsü, ta ashi.

Hitoli Khehoto Jimo-i iba anogomung ratet jembiba mapang, optometrist ya tenük indang primary health care practitioner lir, shirnoki tenük nung timtem aliba indang jangjateta, anepalur.

Iba sentong nungsa NOA convener, Porenthung Odyuo ajanga refractive error indang PowerPoint presentation agüja liasü.

Ki-o-jen yangluba oset lenmang nung mayutsüla: Kohima DC

Dimapur, Metsüremi/March 23 (TYO): Lenmang nung ki-o-jen yangluba osettem tabi agi nangdenba ajanga tzü aoba lenmang nokdanga gari senzütsü mesüa akumer, tetsüng agi senzürtem sadema mesenzüteter aser ajidang masü mopung aser temeket menentsür, ta Deputy Commissioner, Kohima ajanga sangdong ka nung ashi.

Iba dak sendakba nung nüburtem kumzükba alitsü mechi Deputy Commissioner Kohima Gregory Thejawelie NCS

ajanga totuyuba ka nung, Kohima jila telunghzük nung aliba lenmang nung ki-o-jen yangluba osettem agizükba ayuba nokdanga, ta metetdaksüogo.

Iba amala osettsüset ya kiburi tekeratiba nung agentsüla. Kota masüba tensa kar nung iba amala osettsüset agizüktsüsa mesüra agentsüsa kumra, aonung 8:00 ako nungi anepdang 7:00 ako tsüngta inyakatoksüla. Iba totuyuba sülen manidaker nem ozüng agi melaba ama temerenshi agütsütsü, ta sangdong ajangsa ashi.

Myanmar refugee tem nem tejenokdak agütsütsüji onok mapa: Zoramthanga

Aizawl, Metsüremi/March 23 (Agencies): Ato Kilonser Narendra Modi dang Myanmar nungertem nem tejenokdak agütsütsü asoshi mepeshia züluba sülen anogo ishika lir Mizoram chief minister Zoramthanga-i Hombarnü ashiba agi, Myanmar nung shirnok linük toktsür state nung jenoka lir parnok nem humanitarian ground nung chiyongsü aser tejenokdak agütsütsüji par sorkar mapa lir, ta official sangdong ka ajanga metetdaksü.

"Meimchir ka ama külem Myanmar nung nem chiyongsü aser tejenokdak agütsütsüji onok khuret lir, shirnok linük nung military-i sorkar atsüngba sülen mepetmesü adokba ajanga ozü state nung jenoka lir," ta chief minister-i, foreign news outlet ka aser United State nung Chin Arogo lenirtem video conference ajanga jembiba mapang ashi.

Ajisüaka Zoramthanga-i ashiba agi, international ken o dak sendakba nung state sorkari kecha jenjang magitetsü aser refugee ya



state ken o ama magitetsü, kechiyong iba ken o ya Centre-i achaayanger, ta kasa sangdong ajanga metetdaksü. Paisa, pai Centre sorkar dang Myanmar nungertem nem yimden yimsüsüba tsütsü tejenokdak agütsütsü mepeshiogo aser iba ken o sensak asemtsü atema Delhi-i lenirtem yokogo, ta ashi.

Deobarnü Zoramthanga-i Deobarnü linük nungi mintoker aliba Myanmar foreign minister Zin Mar Aung den online ajanga, tang yimden yimsüsüba nung mangatettep adoker aliba aser Zo nungertem timtem nung aliba indang sensaksema liasü.

Mizoram chief minister-i March 18 nü Ato Kilonser

Narendra Modi dangi shiti ka zülüogo, kong pai Myanmar nung Chin nungertem timtem nung aliba Mizoram-i odangbo repranga metoktsütettsü, shirnok Mizo nung den sendaktepa lir, ta ashi

Paisa, Ministry of Home Affairs (MHA)-i, Mizoram densema Northeast nung aliba state pezü dang Myanmar nungi ozüing alema nüburtem senoka aitba meita alitsü tetuyuba agütsüogo aser tetuyuba ozüing alema arurtem tangsa tang meyipa yoktsüji Mizoram-i makoktsü, ta ashi.

Lok Sabha züngsem C. Lalrosanga-i anir Mizoram nungi lenirtemi Union Minister of State for Home Affairs Nityanand Rai den March 18 nü ajurutepogo aser centre dang Mizoram nung jenoka aliba Myanmar nungertem nem chiyongsü aser tejenokdak agütsütsü mepeshia asündangango.

Ketdangsertemi ashiba agi, Myanmar nung military-i sorkar atsüngba sülen Myanmar nung 600 shi Mizoram-i aitogo aser refugee tem ya timba Chin nungertem lir.

Tirap DC-i 'DDMA Tirap' mobile app amenoktsüogo

Itanagar, Metsüremi/March 23 (Agencies): Tirap deputy commissioner Taro Mize-i, static mobile application 'DDMA Tirap' amenoktsüogo aser iba app ajanga yipru, menoknok amala lendong balala dak sendakba nung nüburtem den tekümdangtsü aser tangazükba balala lemsateptsü atema administration nem teyari agütsütsü.

Iba app ya district informatics officer Rakesh Das-i yanglu aser app nung yipru, menoknok, tzümetsüng amala alimar yimya agi teraksatsüba bener arutsüba dak sendakba nung tongtibang temetetsütem aser tetuyuba balala aser district nung item lendongtem achaayangba indang osang agütsütsü.

Maneni iba app nung Tirap district nung emergency service balala indang helpline number tem inokja lir aser kasa mapang nung lendong mapang renema alitsüba aser jenjang agitsüba indang shisema lir.

Iba app ya offline nunga amshitetsü kechiyong data memelenshir.

Iba app sayatsüba mapang Tirap DC Taro Mize-i, Das aser Khonsa National Informatics Centre (NIC)

team nem iba mobile app yangluba atema tenüngsang agütsü, koba pai ashiba agi, district nung aliba nüburtem atema tajangzük asütsü aser parnok nem disaster management dak sendakba nung tangazükba agütsütsü.

Iba app ajangsa lendongtsütong balala atema renemshia ataba aser achaayangba indang tangazükba agütsütsü, ta Mize-i ashi.

Tirap DC-i maneni ajak dang iba application ya pei mobile phone nung download süa ayutsü mepeshi.

Iba app ya Google Play Store nungi download süa amshitetsü.

BJP National tir J P Nadda-i party manifesto sayaogo

Guwahati, Metsüremi/March 23 (Agencies): BJP national tir J P Nadda-i Mongolbarnü, taruba Assam election atema party indang manifesto sayaogo aser delimitation exercise ajanga nüburtem yimden yimsüsüba tsütsü temeden kümzüka toktsütsü nangzükogo.

Party-isa parnok indang manifesto nung tenangzükba ter agütsüogo aser item rongnung Supreme Court-i tetuyuba agüja National Reg-

ister of Citizens inyakiyim benoka inyakba nung aibelentem metongshitsü atema parnoki anir inyaktsü densema lir, kechiyong iba inyakiyim ya chichiba India nungertem kümzüka yur ozüing alema aruba bendangertem anintsü asoshi lir.

Manifesto nungsa BJP-i sorkar kümtetra tanur ajak nem angati education agütsütsü, tzümetsüng nokdangtsü atema inyaktsü aser tenüngdakba oset balala dak sendakba nung state tangar dak metaloker malitsü atema inyakiyimtem benoka inyaktsü ta shia lir.

Maneni 'Orundoi' scheme kübok tetsürtem nem taa agütsüba, koba tang 830 lir iba ya 3000 kümtsütsü aser lisopurtem nem ali kibur temeden agütsütsü, ta shia lir.

Manifesto sayaba sülen Nadda-i, Assam nung Citizenship Amendment Act (CAA) mapang kodang shidak kümdir idangji benoktsü, ta ashi.

Congress aija paisa, "Congress party-i CAA benoktsü atema memelatsü ta shia arudar, koba central legislation ka lir. Parnoki mangatet mesera state nung aliba nüburtem ashioktsütsü meranger," ta ashi.



Uttar Pradesh chief minister Yogi Adityanath-i Mongolbarbarnü Barak Valley kübok Barkhola constituency nung taruba election atema nüboyimba sentong nung o jembiba noksa nung angur. Pai BJP candidate Amalendu Das atema nüboyimtsüba mapang Barak valley aliba Hindu Bengali nungertem vote atsüa arutsü atema jembia liasü.

Congress-i BJP MLA Prasanta anema EC dangi ken o aben

Guwahati, Metsüremi/March 23 (Agencies): BJP MLA Prasanta Phukan-i kin o kin tsüingda tesempatep adokdaksütsüsa jemiba anema Assam Congress-i Election Commission dangi ken o benoko.

Advocate Madhurjya Choudhury-i anir Assam Congress legal team-i Assam Chief Electoral Officer (CEO) Nitin Khade nem Dibrugarh constituency nungi BJP MLA Prasanta Phukan anema ken o benokogo. Pai tesempatep adokdaksütsü asoshi osang prokba atema pa anema ken o benok.

Assam Congress-i ashiba agi, March 20 nü Chabua nung lokti senden ka nung o jembiba mapang Prasanta Phukan-i kin o kin tsüingda tesempatep adokdaksütsüsa osang prokshia liasü.

Assam Congress-i temzüng ozüing kübok Prasanta Phukan nem tapet temerenshi agütsütsü khangogo.

MLA asemben tashi adoker alisang Prasanta Phukan ya BJP tenüng nungi Dibrugarh constituency nung tokteptsü.

"BJP candidate aser Dibrugarh nungi MLA Prasanta Phukan ya Dibrugarh LAC nungi Assembly Election nung toktepdar, pai Chabua nung March 20 nü BJP-i ayongzükba sentong ka nung o jembiba mapang tamangba yimsü dak ajemdaker Assam nung tsüingda tesempatep adokdaksütsüsa o jembiogo,

koba social media aser news channel balala nung prokshiogo," ta Assam Congress-i, Election Commission dangi züluba shiti nung shia lir.

Prasanta Phukan-i Chabua nung o jembiba mapang, Grand Alliance-i state nung taruba Assembly elections kokra Badruddin Ajmal-i Muslim nungertem Naamghars (Assam nung Hindu tem tekülemdak) nung Namaz agitsü tuyutsü ta shiogo, ta Congress-i ashi.

Prasanta Phukan-isa, "Assam nung alirtemi Muslim nung nem Naamghar tem nung namaz magidaksünüra Assam nung alirtemi BJP nem vote agütsütsüla," ta ashi.

Iba olen jembiba atema Assam Congress-i Prasanta Phukan aitsüogo.

Maneni Assam Congress-i ashiba agi, Prasanta Phukan-i jembiba o ya Election Commission of India's Model Code of Conduct nung aibelen ka lir, kong party mesera candidate temi kin o kin, tamangba yimsü mesera oshi balala jembiba teloktem tsüingda mangatettep aser tesempatep aokdaksütsüsa inyaksangshi masütsüla ta jangja jangja shia lir.

"Prasanta Phukan inyakiyim ya Representation of People's Act, 1951, Section 125 aser Indian Penal Code (IPC), 1980 Section 153A aser 295A anema lir," ta Congress lenir aser advocate Madhurjya Choudhury-i ashi.



23 Sector Assam Rifles Serchhip battalion-i Monglobarnü Mizoram Champhai district kübok Rauntlang yimtsüng nung ozüing alema shibelenba areca nuts juli 235 apuba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, METSÜREMI (MARCH) 24, 2021

Tzünglu tzü bendenba

Alima nung tang tashi kin o kin na tsüingda raraba otsü ya ali rakzüka yimsü asütsü atema raraba otsütem lir aser yamaji alima rara tanabuba tashi ali atsüingtettsü atema raraogo saka tangbo kin o kin na tsüingda ali atema masü tzü atema rarar aser raratsü, kechiyong ali dang nungibo nisungtem asoshi tzüang tenüingdakba kümogo. Iba jagi alima kin shia nung ali telong nung aliba tzü merosepdaktsüi wazüka ayutsü asoshi mapatong balala apiteta inyaker. Iba nükjiong ataloktsü asoshi küm shia March 22 ya alima tzü anogo amonger. Aji oda, alima ajunga ya tzü agi sentaktepa alinungji, alima nung alir ajaki angateta pei pei alidak ali telong nung tzü merosepdaktsütsü asoshi tzü meyaka agitsü aser akok tashi tzüinglu tzü tadena yur amshitsü ajungshiteper. Taküm küm alima tzü anogomong omenji 'Tzü apayua amshiba' (valuing water) liasü. Ibaji kodang bilemdangdir, atangji tzü ya jenjang tulu aketba chiyongtsü ka ser nung asenoki mashimashi amshir. Aji oda, tzü agi timtemdang dang asenoki tzü jenjangji metetter. Tzü melira alua meyimettsü, shirurua memetsütettsü, soruchiok mesütettsü aser asenoksasa asenok merüka melitettsü. Ajisüaka, aiben asenoki tzü apayua amshitsü aser wazüka ayutsü asoshibo tebilema mebilemer. Iba jagi, asen nüngdakbo peria küm piyong tzü angutsüba ser nung mangu asenoksasa asenok timatemer. Joko, asen lima nunga tesem aika nung tzü agi kanga anünger, anungji tang ama tzüinglu maruba mapangbo sen tasak agi alia ajemer aser tesem aika nung tzü atatsü atema amuia moi amang piyong tzübo anüker. Iba ama mapangji tzü agi meperi aser mata yimer o yimer na mesüra kiyonger o kiyonger na tsüingda rarateper. Ibaji tzü agi meperi alima nung kin o kin na raratepba amai lir. Tanübo alima rarajia yamaji tenzüksü. Iba tensa tiaji temeimtsüka aser shisabolutsüka lir. Iba tensa tia ya angateta taküm küm alima tzü anogomong nung India ato kilonseri linük nung senso ajak dang tzüinglu aruba mapang tzüinglu tzü tadena ayutsü asoshi renemtsü tayongzükba agütsüogo. Atangji, tzüinglu tzü tangalen meyimdokdaktsüi kidang tzübo yanglur yangji yimokdaktsür rezünga ayutsüba sentong ya tang tasen ka masü, akhidang nungi benshia arur, ajisüaka tangsa tenüingdakba kümogo. Alima nung tzü agi anüingtsüsa akümba ya, talisa, alijak nung süngdonglidong ajema akümba dang masü saka nütüing tali züinba den tzü agitsüsa akümba nüngdak teimba akümba ajanga lir. Akhidangbo, nisungtemi tzüa kangabo mechigu aser süoshia kangabo mashi aser tzü aika nüngdaktsüsa industry-tem lapoka mali asü. Iba denji tanü asenoki industry-tem aser merükmejuba nung tzü agiba ya medemdangra, atangji, tzüim dena roseptsüsa agir. Aji oda, asenoki tzü koda peria agir, yamaji asenok nüngdak peria angutsüsa asenoki tzüinglu aruba mapang akok tashi kidang tzübo nung tzüinglu tzü bendena ayutsü aser tzü meyaka agitsüba dak alaka asenoki tzü meyanglutettsü. Ano, asenok alidak asenoki ali telong nung tzü merosepdaktsüi inyaktsüba mapa kaji, tzüinglu aruba mapang tzübo aser awatsüing alidak yimokdaktsüba dang masü saka ali ongken tur yangji tzüinglu tzüji yimokdaktsüra, iba jagi ali telong nung tzüji ayimsünga oa ali telong nung atsüingdena aliba tzüji merosepdaktsüi kümzüker. Ali telong nung tzü ajema akümba kuli kaji, tanü asüing asenoki asen alidak kima yimdong ajak tzü agi ali metenpoka maitsüsa cement aser bitumen agi jungjunga nembanger, iba jagi lishi aser auyibo madoker saka ali telongi tzüinglu tzü metenpoka maiba jagi ali telong nungji tzü rosepet rosepa alur. Ibaji asenoki tzübo (tube aser ring well) atudang metettsü, kechiyong küm ishika tejaklenbo ali telonglen feet noklang junga tua maluyonga tzü anguba to tangbo feet noklang tema tua aluyonga tzü mangutsü. Ibaji asenoki tzü tali agiba kisüing agibo masü saka tzüinglu arudang ali tema metenpoka tzü maiba ajanga lir. Aji oda, asenoki amshiba mobile phone mesüdaktsüi maneni amshitsü asoshi koda light nung recharge asür, yamaji ali telonga tzü nem metendakja aliji recharge asütsü atema ali telongi tzü yoktsü nüngdaker. Iba jagi dang ali telong nung tzü merosepi teti shitak alitsü.

OLEMSABANG

TENSA DEN PETA CHUBATEM KAKET AZÜNGBA

~ Dr. Temsüyanger, CTC, Aolijen

(Yashi adok nungi...)

Norman Gottwald-i ashir, Israel chubatem mapang lokti ana tsüingda nung teti tashi toktepba liasü. Chuba aser par kibong, aser pa kübok yimsüsürtem telok. Item telok ana tashi toktepba nung kodanga public (nüburtem) tajangzük mangu, saka parnok telok ka mesüra ka tajangzük asoshi dang liasü. Aiben chuba nem pa kübok yimsüsürtemi political pressure agütsü, anungji chuba menden lendong nung aiben liasü. Anungji chubai shiba mesüra shir pa menden asoshi lendong ta metet, pai item lenirtem tali pa kübok ayutsü merang aser pressure agütsü. Yimden yimsüsürtem, sepai nung lenirtem, ali kiburtem, item teloktemi chuba aser pa sendongtem aser pa menden anema nokdaktsü aiben merangba asenoki otsü nung angutsü. Yamaji lokti balala tsüingda tashi toktepba agi sünga liasü.

David aser Solomon Mapang Tongtibang Temelenshi Kar :

Nüburtem rongnung Rongsen akar aser makar telemdang kenyonji adokba Laishirtemi ashir, noklang nung ana agi dang linük rongsen ajunga lalushiponga amshi. Anungji rongsensübaren nung nüburtem rongnung telok ana adok. Yirusalem aser yimti tulu (urban) nung alirtem telok ka, shirnoki linük rongsen ajunga ali melen saru aser inyakyim balala ajanga nüburtem nungi benden. Yimtak lir (rural) sensaker telok ka, shirnoki linük asoshi chiyungtsü adokdaktsü, alinük yanglutsü asoshi nübu agütsü, alinük wazüka ayutsü asoshi nübu agütsü; saka parnok ali nung adokbatem teimba chuba aser pa medemsortemi bener oadok. Yimti nung alirtem parnok chiyungtsü aser jangratema alitsü asoshi yimtak lir nüburtem dak metaloka liasü.

Ali lumang samaba

Israel nüburtem par tetsü-tebou nungi ali-lumang kibong shia liasü. Ali nungi taküm alitsü asoshi ajak adokteta liasü. Ali-lumangji parnok Yihovah Tsüngrem nungi sempet, senmang aser taküm liasü. Ali-lumang par Yihovah Tsüngrem nungi sempet ta parnoki angatet, anungji ali ayoktsü asoshi par sobaliba, tamangba aser temzüng-ozüing nung memela.

Saka kodang Dawid chubai Kanaan yimli aika maktet aser kodang item yimli pa kübok-i ait, kenyonji sobaliba balaka aser ali-lumang tangatetba balaka Israel yimli nung adok. Chubai maktetba yimti ajunga chubar ali-lumang aküm, pa tashi aser pa ket nung item tsükchirtem indang ali-lumangtem ajunga aru. Iba tangatetba tasen kenyonji Israel kidongtem sobaliba tangatetba den balaka liasü. Anungji ali-lumang tangatetba kenyonji balala ana Israel nüburtem rongnung adok. Yimtsüingtem nung ali-lumang Yehovah meyong ta asüba tangatetba nung, kidong aser lokti meyong ali-lumang liasü, saka kodang yimtitem nung kija meyong, chuba aser medemsortem meyong ali-lumang aika aküm. Parnoki item ali nungi adokba ajunga rongsen kümdaktsü aser lalushiponga benshi. Kodang item ali-lumang nung nübu peria mangu parnoki pei nüburtem dang nungi nübu rakzüka amshi (labour extraction). Kodang chubar aser medemsortemi pei nüburtem dang nübu rakzük, aser ali melen saru, iba sobaliba tasen aser libaliro tasen ka par taküm nung adok, aser iba libaliro tasen kenyonji par tejen sobaliba libaliro dang nungi balaka liasü. Libaliro tasen ajanga nüburtem rongnung rongsenkar aser makar lemdanga dok, libaliro tangatetba balala nüburtem rongnung adok.

Solomon mapang nung pai ali-lumang alizükba asenoki otsü nung shia mangur, saka Laishir mongintemi ashir, Solomon-i ali-lumang aika alizük südi, ibaji dang masü, ali-lumang aika pai sosemba agi ali-lumang sempet tanga chubatem nungi angu. Solomon aser Hiram chuba rongsen ketdangsüba nung tesendaktep tajung liasü, saka tesüsa Solomon asoshi khuret tulu aküm. Hiram chubai Solomon nem süng, lung aser hon Yirusalem tenlaki asoshi agütsü, iba melen Solomon-i Hiram chuba nem wheat aser toztü agütsü. Saka Solomon nungi yimti metsü tashi Hiram chubai sempet angu. Iba jagi chuba yimli kübok ali-lumang tashi sempet-tsüpet nung amshitettsüsa tashi liasü. Pei ali-lumang aener ka nem sempet agüjadokba ajanga, ali samaba, taküm chiyungtsü samaba, sobaliba samaba, tamangba samabatem nüburtemi ajuru.

Nüburtem Talidak temelenshi adokba

Solomon mapang nungi yimtitem nung shishilemba maparen tenzü, yangji nüburtemi tamangba benjongbentsü amung, khu abenba tax agütsü, kong nübu taa peria angu, kong kisen-osen peria angu, kong talisa yimtsüingtem nung alir nüburtem chuba mapa nung aser mapa balala nung taah agia inyaktsü mapa angu, anungji yimtsüing nungi nüburtem aika yimtitem oa ali. Kodang yamaji nüburtem taküm nung ajuru, joko yimtsüing nung sobaliba tajung tanemi tashi maiti aküm. Kin-kidong aria bilemtepba, yaritep aliba item ajunga tanami samadok.

Talisa kodang yimti yangluba nung teinyaktsü aika aküm, yimtsüing nungi nübu aika nungdaka aküm. Kodang yamaji lemanng aika aser mapa tajung angu, nüburtem migrate asü. Ibai chuba yimli mapang nüburtem libaliro temelenshi tasen ka liasü.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yikhum Village Baptist Arogoi Rehabilitation Centre ka lapok



March 20, 2021 nü Wokha District kübok Yikhum Village Baptist Church (YBC)-i Rehabilitation Centre (Ekumrhong) semzükbä sülen tangokba noksa nung angur.

Wokha, March 23 (Agencies): March 20, 2021 nü Wokha District kübok Yikhum Village Baptist Church (YBC)-i ministry tasen ka tenzüka temesepba chiyungtsü achirtem anepalutsü atema Rehabilitation Centre (Ekumrhong) ka semzükogo.

Iba sentong nung jembidang Yikhum Baptist Church nem tenüngsang agüja Wokha Deputy Commissioner, Orenthung Lotha-i, "Wokha district nung mezüngbuba 'tobacco free zone' yimdakji Yikhum yim lir, aser ano tang rehabilitation centre ka lapokba ya Arogo ministry indang alizüng tasen ka lir," ta metetdaksü.

Orenthung Lotha-isa, district administration aser stakeholders ajaki iba rehabilitation centre nungita yaritsü, ta metetdaksü.

Tamalen district nung item ama rehab centres lapokaka tamakok nguogo, ta shia

Deputy Commissioner-i, iba ama centre ka takok angutsü atema kanga nendaka inyaker specialist ka aser mongintem nüngdaker, ta ashi.

Paisa, Arogo ketdangsüba kübok iba Centre ajanga state nung nüburtem nem tajangzük agütsütsü imlar, ta ashi.

Kasa sentong nung lokti den salem osang lemsatepdang Chief Medical Officer (CMO) Wokha, Dr. C. W Tungoe-i, Arogoi achaayanga de-addiction mesüra rehab centre lapokba ya chichiba missionary mapa ka lir, ta ashi.

CMO -isa, tamalen Wokha district nung rehab centre ana-District Hospital (1999-2014) nung De-addiction centre aser Inter-denominational care centre (2006- 2013) lapoka liasü, saka senotsü agi anüngba agi tamakok ngua liasü, ta ashi.

District nung yi mesüra temesepba mozü achirtem timba-timba akümer, anungji iba ama centre ya kanga nüngdaka

liasü, ta shia Dr. Tungoe-i, iba centre takok angutsü atema tim department-i melungsoa yaritsü, ta nangzük.

Lokti pelaa agizükba o jembidang Yikhum Village Baptist Church pastor, R. Nzanbemo-i, "Ekumrhong" (taküm kümzükba rong) nüngja nung iba centre lapokba ya samaba tanela ka mesüra kibong kümzüktsü nükjidong nung lapoker, kechiyong yi aser temesepba mozü achiba ajanga nisung ka mesüra kibong ka tanela samaba dang masü saka loktiliba nunga sendoka lir, ta ashi.

Nzambemo-isa, Arogo nung züngsemtem aser temeimertemi tenla tajung agütsüba ajanga iba centre lapoktetogo, ta metetdaksü.

Longsa Baptist Arogo nung pastor, Rev. L.K. Tsanglao-i iba centre meshiteta sarasademtsü aser UBC Doyang nung pastor, Rev. Ellis Lotha-i Tsüngrem O jembia liasü.

Pak nung Khristan aser minorities-i anti-conversion ozüing akhanger

Islamabad, March 23, 2021 (Agencies): Pakistan nung minority tem temeden atema inyakerteri Pakistan Parliament aser Provincial assemblies dang, Khristan densema minority tetsürtem puer oa kangshia tamangba yimsü meyipdaksüba aser Muslim nunger den kangshia kibong kümdaksüba ya anentsüla, ta takhangba agütsüogo.

March 21, 2021 nü seminar ka nung o jembirtemi, linük nung Hindu tsür aser Khristan tsürtem puer aoba, kangshia Islam yimsü dangi meyipdaksüba aser Muslim nunger den kibong kümdaksüba ken otem kanga bulua ataloker, anungji ibaji nokdangtsü atema anti-conversion ozüing nüngdaker, ta ashi.

Karachi Archdiocese nung meimchir temeden atema inyakba wing- National Commission of Justice&

Peace-i iba seminar ya ayongzuka liasü.

Iba seminar nung minority nungi yimsüsürtem, meimchir temeden atema inyaktertem aser tetsür temeden atema inyaktertemi "Pakistan linük temzüng nung minorities temeden balala aser minorities kangshia tamangba yimsü meyipdaksüba" onüktem nung o lemtep.

Meimchir temeden atema inyaker, Seema Maheshwari-i, tesüiba hopta ka kija nunga linük nung kangshia tamangba yimsü meyipdaksüba ken pezü benokogo, ta ashi.

"Sindh nung Hindu nunger aser Punjab province nung Khristantem tanur asüdangyongi kangshia yimsü meyipdaksüba sülen kibong kümdaksüba tebilemtsü kanga bulur. Arrshi küm 12, 13, aser 14 tetsürtem apur aser kangshia Islam yimsü dangi meyipdaksür," ta lai metetdaksü.

"2015 küm Sindh nung aliba Hindu nunger kibong 1,200 shi India-i ogo aser ibaji talisa, parnok nem kasa temeden magütsüba aser tetsürtem küm agi mabensadang kangshia tamangba yimsü meyipdaksüba agi lir," ta lai ashi.

Hindu nütsüng aika aliba Sindh province assembly nung tetsürtem kibong akümtsü atema tajemba agia arrshi küm 18 asütsü atema bill ka agizüka liasü, saka telok kari tamangba yimsü meyiptsü atema küm tatakzük mayutsüla ta iba bill anema nokdak.

Amokmeren aliba nung ajemdaker iba bill agiena liasü. Maneni 2019 küm nunga bill ka benok saka tang tashi magizük.

Sindh Commission for the Status of Women (SCSW) nung menden, Nuzhat Shirin-i, "Minorities takoksa mangutsü atema tang aliba ozüngtem yanglushitsü nüngdaker," ta ashi.

ANOGO ABEN TSÜNGREM DEN

Kodang asenoki arendakdir

"Tomai parnok dang ashi, Ni pa tekabu nung kojat tarak mengura, aser kojat tarak nungji temeyong masenokra ni mamangtsü."(Yohan 20:25)

Mapang kar nung asenoki Tsüngrem dak tamang akaba ajema akümer. Kodangsa asenoki yimlaba mataloker mesüra tamang ka aliba talangka atatsüa akümer idangji Tsüngrem dak amanga aliba ya amajok amai bilemer. Laishiba nung Yisu shia aruba nung mamangjai aliba nisungji Toma liasü, kechiyong Yisu shia aruba mapang pa nütsüngtem den maliasü. Külem tembartemi Yisu shia aruba indang ashidang Tomai amangtsü memulungi aküm. Pa tekabu kojat tarak nungji pa temeyong masenok tashi amangtsü memulung. Saka hopta ka sülen kodang Tomai kuli aginüba ama Yisu pa matsüngdang sayu idangji Tomai Yisu chichiba shia aruba nung amanga liasü. Tamang makatetba nisung dangji Yisui jungkai adoka liasü, kechiyong Tomaji Yisu nütsüng ka liasü. II Timoti 2:13 nung ashir "Asenoki tamang makatetaka, paibo tamang kateta alir. Kechiyong pai pei sasa menanzüki melitet." Asen Kibuba Yisu Khrista aser pa indang metetba shisatsü nung inra pa dak tamang akaba nung tarendak malitsü. Ainer ka dak yaktabo tamang makar, saka talangka meteta aliba nisung dakbo tamang akar. Yamaji nai Yisu metetba shisatsü nung anogoshia aintsü merangra pa dak kodanga rataa malitsü.

Sarasadem

Temeim Yisu ni na shia aruba nung amanger, aser na teti onok dan alitsü nangzükba nung teti tamang akar. Ni Ne dak marendaki amanger. Amen

Minari film ya Tsüngrem den melangtepba film lir: Steven Yeun



Arunachal Pradesh kübok Longliang yimdak ki aika rongdoker aliba noksa nung angur.

film ya tamang nung ajemdaker yangluba film tajung rongnung ka lir," ta Steven Yeun-i ashi.

Iba film nung tsüraburtemji mapang ajak nung Tenla kidangi aoertem lir.

Yeun-i Jacob shilem agir aser Oscar Best Actor atema pa shima lir. Minari film ajangasa Best Supporting Actress (Yuh-Jung Yoon), Best Director (Chung), Best

March 22, 2021: Khristan film- Minari ajanga taküm Oscar Award nominations trok nguogo, aser iba film ya nisung kati Tsüngrem den melangtepba film lir, ta film nung tongti actor, Steven Yeun-i metetdaksü.

Minari film ya Oscars trok atema nominate süa lir, aser item rongnung Best Picture Award densema lir. Film director, Lee Isaac Chung lanuwa Arkansas nung intetba otsü nung ajemdaker iba film yanglu.

Film otsü nung Chung tebu "Jacob"-i par kimongji farm küma yanglutsü aser sen aazüktsü nükjidong nung pai chicken processing plant ka nung pa mapa toktsü, ajisüaka Jacob-i tsüngsarusa (mapang talangka tzünglu maruba) densema timtem/tatidang aika ajurua liasü.

"Film nung Jacob-i shilem tajung aika agir, aser Tsüngrem den melangtepsangji pa lir. Iba

Original Score (Emile Mosseri) aser Best Screenplay (Chung) nominations ngua lir.


Iba film nung David Yi shilem agisang, Alan Kim-a Critic's Choice Award for Best Young Performer atema nominate süa lir.

"Arkansas nung soa intetertemi South tsütsü indang film aika mereprangteter," ta Chung-i ashi.

Minari film otsü nung, temesüng nisung timba aliba Arogo kati Chung'er Korea-American kibong ka kanga pelaa agizüker.

Iba film nung 'Dream for Me' ken Mosseri-i zülü aser iba kenji film den kanga tapet.

Yaküm osangbener den jembidang Chung-i, "Taküm (2020) wara ajanga timtem balala ajangshir aliba mapang ka nung iba film ajanga nisung aika nem teimla agütsütsü ta ni imlar," ta metetdakja liasü.

OLONG PAITEP # 5762**TIPIEN**

1. Lemdang
3. Tatalokbatem
5. Tamasa
6. Pei meyong aküm
7. Kolem nung atongba
8. Kinungbutem
9. Anisüngzük
12. Nü den tambu
13. Lilir
14. Yagi sü ataker
15. Temadok

LANGTSÜNGLEN


1. An tetsüdi
2. Iba yagi teküp sentsü melener-
3. Tamentakdak
4. Ngasangatema bilem
7. Inyaksü bilemba
8. Süngjang telung nung aliba
10. Ano balaka
11. Ano mamen

OLONG PAITEP # 5761 TELANGZÜBA**TIPIEN :**

1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük, 11. teronem,
12. Sempa, 13. Jahaz.

Noksa nung meputepi aliba 10 bushiang**TANÜBO NAI LANGZÜANG**

Q. International Solar Alliance nung linük kwika dena lir?

- A. Linük 121 B. Linük 131 C. Linük 141 D. Linük 122

===== (Taruba adok nung onoki langzüksü)

YASHI ADOK TELANGZÜBA : 1948

AO OSHI ANGAZÜKDAK:**TANÜ ANGAZÜKTSÜBA OJANG****Aong**

(v) Süngdong nungi süngjang agizükba (pluck)

* Tanurtemi arem nung süngjang aika aong

Aong

(v) Kusünok agi tezüng endokba (shave)

* Ku mejeperi kü indang bangsemo aong.



Tir Yimym

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

NAI-A YA METETTER MA?**ALIMA NUNG PELAAALIBALINÜK (Happiest Country) 20: 2021**

- | | | |
|-------------------|--------------------|------------------------|
| 1. Finland | 2. Demark | 3. Switzerland |
| 4. Iceland | 5. The Netherlands | 6. Norway |
| 7. Sweden | 8. Luxembourg | 9. New Zealand |
| 10. Austria | 11. Australia | 12. Israel |
| 13. Germany | 14. Canada | 15. Ireland |
| 16. Costa Rica | 17. United Kingdom | 18. The Czech Republic |
| 19. United States | 20. Belgium | |

SUDOKU # 5804

	8	1					
	9	7		8	1		
		6	7	9	3	1	4
9		5	6	2			
6	4		1		8		
				5	7	9	6
	2		8				
	6	9				3	8
5				4			2

TELANGZÜBA # 5803

1	4	2	5	6	3	7	9	8
9	3	6	8	7	4	1	2	5
7	5	8	2	1	9	3	4	6
5	2	7	1	4	8	9	6	3
8	1	4	3	9	6	2	5	7
3	6	9	7	5	2	4	8	1
4	9	3	6	8	7	5	1	2
2	8	5	4	3	1	6	7	9
6	7	1	9	2	5	8	3	4

OJANG LUTEP # 5348

NROSNGE	:						
LTUU	:						
DAPEZÜNNG	:						
UNNIBGO	:						
TKAE	:						
NNUG	:						
RSEONGN	:						
RTAE	:						
LAAIIBJ	:						
TBAAO	:						

OJANG LUTEP TELANGZÜBA # 5347

TETSÜNG TEKA BELEMA INYAKA JAJAR TEMI
TACHI TAJEMTSÜ PERIA ANGUR

TAN HOPTA ATEMA - KOMA SÜLA ?

Q. JCPI teloki akangba ama tangsa tang 1963 küm 1st December nung ajemdaker, Nagaland Senso Register (Register of Indigenous Inhabitants of Nagaland) ka lapoka Nagaland sensosanger tenüng zülüok tenzük nunga koma süla ?

Olong 20 shi nung March 26, 2021 tashi nung iba telangzuba ya onok dangi (e-mail - tiryimym@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzubatemi taruba Honibarnü adoktsütsü.

Chhattisgarh nung IED agi DRG sepai 5 pokset



Chhattisgarh nung IED agi DRG sepai 5 pokset

Raipur, March 23 (Agencies): Mongulbarnü Chhattisgarh kübok Narayanpur district nung district reserve guard (DRG) sepai pungu tashi poksetogo.

Police tesepe ka nungi kilometer 3 shi pilar Maoist telungpurtemi IED ka pokdaksü.

Osang angazükba agi bus gari nung sepai 20 tema mena liasü aser parnok ya Abujhmad min nung naxal anema mapa inyakba nung shilem agirtem liasü.

Tanü nikongdang 4.15 ako meta Kanhargan-Kadenar nung iba lendong atalok.

Bus gari ji culvert ka nung apu ka ajanga süidang Impro-

vised Explosive Device (IED) tesashiji pokdaksü.

"Dantewada aser Naraynpur nungi DRG teloktem anogo ananü operation atema ao. March 23 nü DRG sepai 90 shi ka Naraynpur nungi Kademeta camp atong. Iba sülen district headquarters nung mapa lemezüka aliba DRG telok bus gari ka nung Narayanpur-i apusoa ao" ta police ketdangsür kati ashi.

"Iba lendong nung nisung 14 kanga mejungi yirua lir aser parnok rongnung nisung asembo Raipur-i tayimtsü ajanga anir ogo" ta Bastar IG P Sundarraj-i ashi.

Tasürtemji Pawan Man-

davi, Jaylal Uike, constable Sevak Salam, constable Karan Dehari (bus driver) aser assistant constable Vijay Patel nung liasü ta jangjaogo.

Chhattisgarh Chief Minister Bhupesh Baghel-i iba lendong nung asürtem atema mangyimba metetdaksüogo.

Yirua alirtem akokba tashi yaritsü atema state police ketdangsürtem nem tetuyuba agütsüogo, ta paisa ashi.

Bastar telongtet nung IEDs aika rema yutsüaka, taküm Maoist telungpurtemi sepaitem amakbaji tang mezüng lir. Yaküm March 21 nü Sukma nung DRG sepai 17 tashi khaset.

Kerala nung NYAY takok ngura, linük ajungalen inyaktsü: Rahul

Puthuppally, March 23 (Agencies): Kerala nung minimum income guarantee scheme (NYAY) takok ngua inyaker süra India ajungalen benshitsu, ta Congress lennir Rahul Gandhi-i metetdaksü.

Puthuppally Assembly constituency kübok Manarcad nung Rahul-i nüboyimba sentong ka nung iba osang metetdaksü. Iba ya taoba chief minister Oommen Chandy indang constituency lir.

2019 Lok Sabha elections matongdang Congress-i NYAY scheme atong aser iba ya Kerala nung Congress-i aniba United Democratic Front (UDF) indang manifesto nung tongtipang tenangzükba ka lir.

"Kerala nung alirtemi kodanga mebilemdangba ka lir. Na autorickshaw driver ka mesüra rubber lu ayimer ka asütsü akok, saka iba ya nai imlaba dang nungi talila lir. Onoki ita nung Rs 6,000 agütsü aser Kerala nung kibong shia nem agütsütsü. Iba tetezü ya nü indang account-i küm nung Rs 72,000

aitsü" ta Rahul-i metetdaksü. "Asenoki kechi ataloktsü'ar meteta lir. Nü indang bank account-i sen aitba sülen nai senji endoktsü. Nai sen endok tenzükdang nisungtemi nai aginüba products yanglu tenzüksü. Kodang nisungtemi products nungdaktir, nisung kari item products yanglutsü aser iba yangluba factory tem nung mapa inyaktsü angutsü" ta paisa ashi.

"Ni iba ya Kerala nung tendanga reprangnür, aser takok ngura linük ajungalen inyaktsü. Kerala-i linük dang sensaktia anema raraba sayutsü. Asenoki iba sensaktia samatsütsüla. Kerala nung tashi, shisatsü aser tekolok nungi tajangzük agütsüla" ta Congress lennirisa shisem.

Rahul Gandhi-isa Kerala nung rubber lu ayimertem dang UDF nem vote enokja sorkar kümdaktsüra, Rs 250 minimum support price angutsü ta nangzük.

Kerala kübok Kottayam, Idukki aser Pathanamthitta district tem nung rubber lu ayimer aika lir.

Rajya Sabha nung opposition-i NCT Bill anema nokdak

New Delhi, March 23 (Agencies): Mongolbarnü Rajya Sabha nung Government of National Capital Territory of Delhi (Amendment) Bill, 2021 benokba sülen Opposition-i iba bill anema nokdakba mapang nung rongrong adokba agi nikongdang 5:40 ako tashi senden thinena liasü.

Hombarnü Lok Sabha nungbo iba bill agizükogo; iba bill ajanga 'sorkar' tetezü legislative assembly-i yangluba ozüng ajakji Lieutenant Governor-i agizüksüla.

Iba bill ya agizükra iba ajanga National Capital Territory of Delhi Act, 1991 melentsü.

Lok Sabha nung iba bill benokba mapang nung, Delhi Legislative Assembly-i agizükba ozüng ajakji National Capital Territory of Delhi nung Lieutenant Governor-i agizüksüla, ta metetdaksü.

Delhi nung AAP-i opposition party tem dang Rajya Sabha nung iba bill anema nokdaksü atema jelia mepishir liasü.

Hombarnü Lok Sabha nung iba bill agizükba sülen tanü Rajya Sabha nung Congress aser AAP nati National Capital Territory of Delhi (Amendment) Bill, 2021 anema nokdak. Parnoki tanga opposition party tem aser NDA teloktep nung dena maliba party tem danga iba

bill anema nokdaksü atema mepishia liasü.

AAP-i, NCT Bill ya linük temzüng alema lir, aser iba bill ajanga Delhi sorkar indang schemes ajak anentsütsü, ta ashi.

Centre sorkar aija Congress-ia, NCT Bill ya democracy tepsetba lir, ta aitsü.

"Lieutenant Governor bill nükjidong ya Delhi sorkari angati light, tzü aser angati temang treatment agütsüba schemes ajak anentsütsü atema lir. Iba ozüng ajanga BJP-i LG nem tashi ajak agütsüner," ta Sanjay Singh-i ashi.

AAP tongti aser Delhi Chief Minister Arvind Kejriwal-ia, "Lok Sabha nung GNCTD amendment Bill agizükba ya Delhi nüburtem mezüngmeshiba lir. Iba Bill ajanga nüburtemi vote agüja shimtetba nisungtem dang nungi tashi agiena tamakok angurtem nem tashi agütsütsü. BJP-i nüburtem ashiochtsüogo," ta aija liasü.

Tawa Jantar Mantar, New Delhi nung NCT Bill anema longkak aitba sentong nung jembidang Kejriwal-i, "Delhi nüburtem atema ajak inyaktsü onok renema lir. Nenoki inyakba mapatemji onoki menokdangtsü aser onoki-a Delhi nüburtem indang tashi magütsütsü," ta metetdakja liasü.]

Aluyimertemi Nov-Dec tashi longkak aitsü renema lir: Tikait

Jaipur, March 23 (Agencies): Aluyimertemi aluyimba ozüng tasen asem anema taküm November-December tashi longkak aitsü renema lir, onok nükjidong matalok tashi ni kidangi meyipa maotsü, ta Mongolbarnü aluyimertem lenir, Rakesh Tikait-i metetdaksü.

Mongolbarnü Jaipur nung 'Rajasthan Kisan Mahapanchayat' sentong nung jembidang BKU lenir, Rakesh Tikait-i, Centre sorkar anema longkak aita aluyimertemi Parliament complex nung

aonsotsütem ayoktsü, ta metetdaksü.

"Parnoki kin aser tamangba yimsü nung ajemdaker asenok (aluyimertem) tsüngda telemsa adokdaksütsü merang, saka asenoki telemsa madokdaksütsü. Nenoki (aluyimertem) tractors bener Delhi tashi aotsüla. Nenoki aluyimertemi züsentetba aonsotsütem Assemblies, Collectorate aser Parliament kima ayoktsüla. Ato kilonseri, aluyimertemi tesem mashie nung alu nungi züngsentetba yoktettsü ta shiogo, anungji

asenoki Parliament densema tesem mashie nung aonsotsütem ayoktsü. Parliament dang nungi tulutiba market mali," ta pai ashi.

"Tesem ajungalen nungi Delhi longbangogo. Asenoki linük tesem ajungalen longkak aitsüla, talisa lanurtemi iba mapatong ya tejakleni bener aotsüla," ta pai ayongzük.

Aluyimertem longak aitba tashi taitba akümtsü nükjidong nung tang Tikait-i Rajasthan tesem ajaklen Kisan Mahapanchayats aika nung jembia arudar.



March 23 nü New Delhi nung 'Bringing Synergies in Anti-corruption Strategies' webinae nung Lokpal mendenbuba Justice Pinaki Chandra Ghose-i o jembiba noksa nung angur.

Niger yimtsüing nung asür nisung 137 jungogo

Niamey, Metsüremi/March 23 (Agencies): Motorbike nung arua lendong agütsürtemi southwestern Nigeria nung yimtsüingtem maka nisung tajemba agi 137 tepset, ta sorkari ashi.

Deobarnü prangbong bena alirtemi Mali den arrtsü anasa aliba Intazayene, Bakorat aser Wistane yimtsüingtem nung arakzüba ajak nung injang khaloktsü, ta yangji aliba ketdangsürtemi ashi.

Iba lendong nung nisung 137 asü, ta sorkari Hombarnü ashi. Sorkari osang mesangdongdang yangji alirtemi nisung 60 shi asü, ta shia liasü.

"Prangbong bena alirtemi civilian tem dak tenük yoker yimya balala nung azüdokshia aruba inyakyim nung tang mera talia agiloka aor," ta sorkar indang odongtar Zakaria Abdourahamane-i sangdong ka public television nung zünga ashi.

Osang agitepa yimtsüingtem amakba ya Niger tir tasenba, Mohamed Bazoum asoshi tebilemtsü tuluba akumer, shiba taoba ita election agiba nung takok anguba indang Deobarnü linük nung tematiba court ajanga jangjaja lir.

United Nations ajanga linük 189 asadanga nung Niger ya alima nung tesensaktiba linük

lir, aser yangji telungpur telok balalai azüdokshiba menokdangteter, koba Mali aser Nigeria tashinung oa kongshia nisung noklang aika tepsetogo aser million tesadang ka shi tesem balala nung jenoka lir.

Deobarnü amakba yimtsüing asem ya Tahoua region nung Tillaberi arrtsü anasa lir, aser tesüüba küm 10 shi Sahel region nung rongrong adokba timba iba region nung liasü, aser ano külen al-Qaeda aser ISIL (ISIS) den sendaktepa aliba telungpurtema lir.

March 15 nü telungpurtemi Tillaberi region nung Banibangou jila nungi shishilempar mena aliba bus ka maka nisung 66 tepset, Darey-Daye yimtsüing maka yangji alirtem tepset aser tsük yua aliba rongdoktsü. Kasa anogosa 'tri-border area' ta nüngja agüja alidak Mali sepai 33 tepset, koba ISIL temi tenüng agi. Iba tesem ya Niger, Burkina Faso aser Mali arrtsü nung lir.

"Banibangou nung nisung aika tepsetba sülen yashi kiralongrar temi kasa yimya amshia Intazayene aser Bakorat tesunep nung aliba nisungtem dak amak," ta Bazoum-i Twitter nung metetdaksü, aser asür kinungertem den asükhu

lemsatepa liasü.

February 21 election nung takok angusang Bazoum ya taoba mapang interior minister inyaka liasü, shiba taoba Tir Mahamadou Issoufou melentsü, ta nüburtemi züngshia aru.

March 15 nü azüdokshiba sülen pai Tillaberi region nung sepai talila yoksema lir, aser telungpur den raratsü nangzüük.

Sahel region nung France-i nungitba linüktem rongnung Niger ya dena lir, koba dang G5 ta ajar. Chadian army nungi sepai 1,200 tashi G5 kübok yoka lir, koba region nung tesashitiba sepaitem, ta züngshir.

Tillaberi kübok Mangaize district nung January 2 nü yimtsüing ana amak aser iba mapang nisung 100 asü. Niger puti otsü nung azüdokshi tamajungtiba ka ta züngshiba iba lendong ya linük tir atema election anaben agiba tetsüingta nung ataloka liasü.

2020 küm January 9 nü Chinedogar nung aliba mitkar camp ka telungpuri amakdang Niger army 89 tashi takum sama.

Tillaberi region kübok Inates nung 2019 küm December ita telungpuri Niger sepai 71 tepset aser kasa küm February ita Chinedogar nung sepaitem amenoka alidak amakdang nisung 89 takum sama.

Colorado nung shishilempadak nisung ter khaset

Boulder, Metsüremi/March 23 (Agencies): US kübok Colorado state nung aonsotsü ayokdak tesem ka nung ghonda ishika khatepba sülen police ka densema nisung ter khaset.

Police temi King Soopers market nung temolung melemi alisang apuba sülen iba lendong ya tatem kati aru, shiba yirur liasü.

Iba lendong ya tenük kuli alirtemi live-stream süa YouTube nung sayu.

Asürtem rongnung arishi küm 51 tain Eric Talley liasü,

aser pa ya iba lendong nung arua lendong azüoktsü meranger police mezüngbuba liasü.

"Ibai Boulder County asosho lendong tulu aser mamatetba inyakyim ka lir. Nisungtem ya shishilempa liasü. Asür nem ochi obendang agütsütsü ni Colorado state nung aliba nüburtem dang nangzüük," ta district attorney, Michael Dougherty-i ashi.

Asürtem rongnung tanüingba nisung asem mesüra lendong ya kechi nükjidong

nung agütsüar ano memetet.

Iba grocery store ya Boulder nung mazüngi aliba shishilempadak tesem ka nung lir, koba state yimtiba, Denver nungi mile 30 shi pilar lir.

Atlanta nung aliba spa asem nung Asian tsür trok densema nisung ti khaseter hopta ka majungdang supermarket nung iba lendong ya ataloker.

Iba lendong ya Hombar nikongdang 2:30 ako meta tenzüük, kong temolung melemi alisang supermarket telungi aita injang khaloktsü tenzüük.

Rohingya camp nung mi lendong atalokba bushisüingdanger

Dhaka, Metsüremi/March 23 (Agencies): Bangladesh nung aliba Rohingya refugee camp ka nung kitsük-kirong lendong atalokdak nisung 15 asü aser ano nisung 400 shi samar bushir, ta United Nations refugee agency ajanga ashi.

"Ibai tulu liasü aser tesüingmangtsüka liasü," ta UNHCR nungi Johannes van der Klaauw-i Mongulbarnü Dhaka nungi ashi.

"Tang tashi nisung 400 shi monguteter, parnok ya jana agi nembanga alitsü akok. Iba lendong nung nisung 560 yiruba aser nisung 45,000 talidak maka tesem balala nung prokshiba osang ka UNHCR ajanga lemsatep," ta pai ashi.

B a n g l a d e s h ketdangsürtemi iba kitsük-kirong lendong adokba bushisüingdanger aser jana nung maneni nisung tasü mang bushir, ta iba linük ketdangsürtemi ashi.

Hombar nikongdang iba kitsük-kirong lendong ya Cox's Bazar anasa Balukhali camp nung ataloka azüki meyrirjang aika rongdok aser nüburtem pei indang osettsüset bendentsü nungzütepa liasü.

Item camp nung alirtem ya timba 2017 küm mitkartemi anir Rohingya nung anema azüdokshia mapa tamajung inyakba mechi Myanmar yutsür jena aruba lir, koba kin samatsütsü merangba mapa ka lir, ta UN-i aitsür, saka Myanmar-i magizüker.

2017 küm nungi adenshia alidak kitsük-kirong lendong tulutiba ya atalokba mapang süngkum aser tarpaulin amshia ki yanglua aliba rongdok aser sorochiok dang amshiba gas cylinder tem apokba sülen mi ya tuluba akum, ta Police Inspector Gazi Salahuddin-i ashi.

"Mi ya ghonda 10 shi jangrua liasü. Nüburtem pei takum kumzüütsü asemtepa ao. Iba mapang aika yiru aser nisung tasü mang pezü angu," ta Save the Children nungi volunteer Tayeba Begum-i ashi.

"Mi ya kechi nungi adokar ano mejangja. Ketdangsürtemi mi tenzüükba bushisüingdanger," ta police tanishir Zakir Hossain Khan-i osangbener dang telephone ajanga ashi.

Iba kitsük-kirong lendong nung tejenokdak ki 17,000 dak tema rongdok aser nisung meyrirjang ter dak tema tesem balala nung jenoka lir, ta Bangladesh

nung International Federation of Red Cross and Red Crescent Societies tekolakba, Sanjeev Kafley-i ashi.

Mi ya camp indang section pezü nung jangrua ao, kong nisung 124,000 shi telidak liasü. Bangladesh nung Rohingya refugee million ka dak tema aliba nungi shilem ter shi iba tesem nung alir, ta pai ashi.

"Iba Coz's Bazar nung ni küm asem ser tesadang liogo saka iba ama mi tulu ya kodanga mongudang. Item nisungtem ya anaben tashi tesem balala nung jenoka alir. Aika asoshi kecha anünga mali," ta pai osangbener dang ashi.

Camp müketa barbed wire (yinzü) mesanga aliba ajanga nisung aika yangji ashi aser kar yiru ta tenük kuli alirtemi ashir aser ibayongji yinzü mesanga aliba agientsü international humanitarian agency ajanga akhanger.

Iba kitsük-kirong lendong nung nisung 50,000 shi tesem balalai prokshia ao aser takoksa agütsüba ya jangjatetsü asoshi mapang agitsü, ta Humanitarian organisation Refugees International ajanga ashir.

"Tanurtem aika samar bushir, aser camp nung barbed wire mesanga aliba ajanga kar jena motet," ta parnoki sangdong ka ajanga ashi.

Rohingya nung asoshi temeden bushitsüba tentet, Fortify Rights nungi John Quinley-ia iba mesükba osang ya angashiogo, ta ashi aser item yinzü ya aliba ajanga taoba mapang camp tem nung tongtipang service agütsüba aser teyari agütsüba mapanga tetsükdaksü ajurua liasü, ta ashir.

"Sorkari yinzü ya indoker refugee te kumzüka ayutsüla. Camp tem nung kitsük-kirong lendong tulu ataloka arur, aser taküm January ita nunga atalokogo. Mi adokba atema ketdangsürtemi timi bushisüingdangtsüla," ta Quinley-i ashi.

Anogo pezü tsüingta kitsük-kirong lendong asembuba ataloker, ta fire brigade ketdangsür kati ashi.

Hokulbamüa campana nung mi adoka ki aika rongdoka liasü. January ita nunga kitsük-kirong lendong tulu adoka nisung meyrirjang aika talidak kimaka akum aser UNICEF ajanga lapokba kakat rejua pezü rongdoka liasü.



December ita teloktep sorkar laoba sülen Israel nung küm ana tsüingta general election pezübuba Mongulbarnü agiogo. Israel nung ato kilonser talangtiba inyaksang, Benjamin Netanyahu-i March 23, 2021 nü agiba election nung maneni takok angutsü imlar.

Tanü nungi Kohima nung SARAS Fair tenzüksü

Kohima, Metsüremi/March 23, 2021 (TYO): Exhibition aser sale sentong ajanga yimtsüng tem nungi züsentetba süngolembe/süngjanglijang ajungkettsütsü aser Self Help Groups (SHGs) temi parnok indang product tem ajungkettsü asoshi, SARAS Fairs ya Ministry of Rural Development, Government of India indang mapatong ka lir.

Nagaland nung yimtsüng aser small scale sector tsütsü tajangzük angutsüsa tashi tulu lir; ajisüaka item nungi adokba product tem ayoktsü atema market peria maliba ya ajak asoshi tetsükdaktsü tulutiba alitsü.

Iba fair ajanga yimtsüng nung alirtem aser entrepreneur tem nem shishilembaba (marketing) maongka lapoktsütsü aser jila tesemtem nung alirtem tsüngda yimtsüngtem nungi züsentetba indang tajangzüktem metetdaktsütsü.

Iba amala mapatong ajungmesoa inyakba ajanga State rongsenkettsüng tsütsü nungittsü aser yimtsüngtem nung shishilembaba maparen nung terenlok lidaktsütsü.

Alu/atsü nungi züsentetba süngjanglijang aser süngolembe tem; naro, jang, 'preserved food' aser pickle; amtsük aser 'savory'; süngjanglijang juice aser 'medicinal extracts'; atakba/mechiba sü aser süng agi yangluba osettem den kitchen goods tem fair sentong nung ayoktsü.

Regional SARAS Fair ya Khouchiezie (Kohima Local Ground) nung March 25 nungi March 31, 2021 tashi alitsü aser anogoshia anepdang 9:00 ako nungi aonung 6:00 ako tashi stall tem lapoktsü.

Minister, Rural Development, Metsubo Jamir-i Bodhbar (24.03.2021) anepdang 10:00 meta Khouchiezie (Kohima Local Ground) nung item stall semzüksütsü, ta sangdong ka ajanga metetdaktsü.

Poco-i X3 Pro aser F3 Smartphone sayaogo

New Delhi, Metsüremi/ March 23, 2021 (Agencies): Poco-i 'Poco X3 Pro' aser 'Poco F3' ta nüngja agütsüba smartphone ana sayaogo. Smartphone anaprongla nung 20-megapixel front camera aser 33W fast charging dena lir.

Poco X3 Pro nung Qualcomm meyong Snapdragon 860 processor tasen inoka yanglutsüogo, koba flagship 4G smartphone tem atema alakteta yangluba processor alitsü.

Ano külen, Poco F3 nung Qualcomm Snapdragon 870 SoC angutsü. Iba smartphone tereprangtsü aser specification tem Redmi K40 ama alitsü, koba taoba ita China nung sayaogo.

Poco smartphone anaprongla nung Android 11-based MIUI 12 inoka yanglutsüogo. Poco F3 ya Night Black, Arctic White aser Deep Ocean; aser Poco X3 Pro sentsü tanak nung angutsü.

Poco X3 Pro nung 6.7-inch FHD+ LCD display den 120Hz refresh rate, 240Hz touch response aser 450nits peak brightness dena lir. Tekümzüksü atema, phone screen panel ya Corning Gorilla Glass 6 agi meyibangtsüogo aser selfie camera atema tekolaklen hole-punch cutout angutsü. Iba smartphone nung

Qualcomm Snapdragon 860 SoC den 8GB RAM aser 256GB UFS 3.1 storage inoktsüogo. Memory ulua aginürtemi, microSD card ka ajanga 1TB tashi atsülanga amshitettsü.

Poco X3 Pro battery tasazük 5,160mAh lir aser 33W fast charging support asür, k Poco-i ashiba agi, X3 Pro yagi ghonda 11 gaming asayateter aser video playback ghonda 18 alitsü.

Camera tsütsü reprangdangra, iba smartphone nung 48-megapixel primary camera den f/1.79 aperture, 8-megapixel ultra-wide-angle camera den f/2.2 aperture aser macro den portrait photography atema 2-megapixel shooter ana angutsü. Selfie aser video calling atema, phone tejaklen 20-megapixel snapper inoktsüogo.

Tanga feature rongnung, Poco X3 Pro atema Android 11-based MIUI 12 custom skin, LTE, dual-band Wi-Fi, Bluetooth 5.0, GPS, NFC aser USB Type-C port inoktsüogo.

Poco X3 Pro - 6GB + 128GB model jenjang EUR 249 (sen 21,500) aser 8GB + 256GB model jenjang EUR 299 (sen 25,800) alitsü.

Iba phone alir mezüng alir atema company-i offer balala agütsütsü renema lir.

Maneni, Poco F3 nung 6.67-inch FHD+ AMOLED display den 120Hz refresh rate, 360Hz touch response aser selfie camera atema 2.76mm punch-hole cutout angutsü. Iba phone nung Qualcomm Snapdragon 870 SoC den 8GB RAM aser 256GB storage angutsü, koba microSD card ka ajanga memory atsülangtsü akok. Android 11-based MIUI 12 custom skin out of the box ajanga iba smartphone achaayangtsür aser 4,520mAh battery den 33W fast charging dena lir. Poco-i ashiba agi, iba phone battery asüngtsü atema minute 52 agir.

Camera atema, phone tesülen triple camera system angutsü, kong 48-megapixel primary sensor, 8-megapixel wide-angle lens aser 5-megapixel macro lens dena lir. Selfie atema Poco F3 nunga 20-megapixel inoka yanglutsüogo.

Tanga feature tsütsü reprangdangra, iba smartphone nung 5G, 4G LTE, Wi-Fi 6, Bluetooth 5.1, GPS aser USB Type-C angutsü. Iba smartphone 6GB + 128GB jenjang EUR 349 (sen 30,100) aser 8GB + 256GB model jenjang EUR 399 (sen 34,400) alitsü.



Mokokchung nung osangbenertem Immunization office Mokokchung nung Covid19 vaccine mezüng dose agir külen yangji inyaktertem den külemi tangokba noksa nung angur. Mokokchung, March 23, 2021.

150

YEARS OF CELEBRATING THE MAKATHA

NAGALAND HANDLOOM & HANDICRAFTS DEVELOPMENT CORPORATION LTD

(A Govt. of Nagaland Undertaking)

Dimapur : Nagaland

Cordially invites you to the

SPECIAL HANDLOOM EXPO

to be inaugurated by

Hotolu Sema

SDO Civil, Dimapur

on

24th of March 2021 at 11:30 am

at Urban Haat, Dimapur

With regards

Nagaland Handloom & Handicrafts Development Corporation Ltd.

Sponsored by:

Office of the Development Commissioner
for Handlooms, Ministry of Textiles,
Govt. of India, New Delhi

Mr. Tinusowa Lkr, s/o Mr. Sobulemba, resident of Aoyimkum Village, Dimapur. Ali patta No.812 ya samaogo anungji iba ali patta ya tanü nungi invalid asür. Aser patta tasen yanglur.

Dimapur Police-i bike auyar telok ka apu

Dimapur, Metsüremi/March 23, 2021 (TYO): Dimapur Police-i nisung pezü :- (1) Toluka Chophy (30 yrs) (2) Akato Chophy (37 yrs) (3) Sukhato Achumi (26 yrs) aser (4) Kivigho Kiba nunger atonga apuba sülen, 2(two) wheeler auyar telok ka puogo, ta ADCP (CRIME)/PRO, Dimapur sangdong ka ajanga metetdaktsü.

Dimapur tesem balala nungi East Police Station indang Special Team kati, auertemi auyaba two wheeler 18 - Royal Enfield (1 no) - TVS Apache (3 nos) - Hero Glamour (2 nos) - Bajaj Platina (3 nos) - Bajaj Discover (2 nos) - Hero Splendour (1 no) aser Scooty (6 nos) ngutet.

Hopta asem tashi nendak nendaka aser asalentong tajung yanglur mita bushisükdanga aruba sülen, Special Team-i item bike auyar telok puteta liasü.

Kasa sangdong ajanga angazükba agi, Mongolbarnü 4th Mile area, Dimapur nungi Dimapur Police-i Mini-truck 407 ka nguteta lir. Auertemi auyaba mini truck ya East PS aser AVTS team-i ngutet. Iba sülen, gari ya Karbi Anglong Police, Assam ket nung yutsüogo.

Maneni, Bodhbarnü (17.03.2021), 4th Mile len dokan tem nungi ozüng alema rakzükraktema senzür ka police-i apu. Pua alisang ya arishi küm 32 tain Vinoka Sumi ta jangjaogo. Iba maparen dak sendakba nung, pua alisang anema Diphupar PS nung keno ka benokogo, ta kasa sangdong nung shia lir.

Press Council of India... (Tapak 2 nungi...)

Pai ashiba agi, state jenjang kanga junga angatettsü aser state nung media-i tetsükdaktsü kar danga ajangshia lira item indang tsüngtong aru jangjatsü atema sub-committee-i state semdangr ta ashi. Iba sülenang mangatettep adoka aliba tesem nungi osang agütsüba dak sendakba nung media aser security forces-i anidaktsü atema guideline tem yanglutsü asoshi inyakteptsü, ta pai ashi.

DGP Nagaland, T. John Longkumer, IPS-i, state jenjang metetdaktsü aser state yimjung nung dang lir aser state nung Media amokmerenba ken o kecha mali ta ashi. Paise linük nung tanga tesemtem nung alirtem den medemdangra Naga nungertem pei tebilemba sadema lemsateptsü asoshi kecha balaka tenokdangba mali, ta ashi.

Maneni T. John-i, media aser security forces na tsüngda tesendaktep kanga junga lir aser mapang shia kati ka yariteper, ta ashi. Tanga police ketdangsür tejentemia DGP-i lemsatepba onüktem nongita jembi aser ashiba agi, state nung media ya sorkar mesera tanga lokti tenteti manishi pei mulungka nung inyaksangshir.

Senden tatemi Sub-Committee züngsemtemi DGP Nagaland den pa kübok ketdangsürtemi teka amteper senti shisatsü agütsüba atema pelaba lemsatep aser item shisatsü ajanga guideline yangluba nung parnok nem teyari agütsütsü koba ajanga telok anaprongla ajangzüksü, ta ashi.

Y Patton-i 36buba PDSA Meet lapoktsü



Thenyizu, Metsüremi/March 23, 2021: Mongolbarnü, Thenyizu yimda Deputy CM Patton aser Minister Neiba Kronu nati 36buba PDSA Meet lapoktsüba mapang agiba noksa ka yangi angur.

Thenyizu, Metsüremi/ March 23, 2021 (TYO): Mini Olympic village ka ama, Mongolbarnü Thenyizu village, Chozuba sub-division, Phek district nung Chokri Area Games and Sports Association (CAGSA)-i 36buba Phek District Sports Association (PDSA) indang Meet tenzüktüsügo.

Iba Meet atema alakteta tejaoker Nagaland Deputy CM Y Patton-i iba asayamung lapoktsüba mapang pai Thenyizu village indang local ground semzüktüka liasü.

Anogo pungo tashi ayonga agitsü aliba meet nung weight category balala nung Naga wrestling (men), track & field asayatem talisa tetsür aser tebur atema football, volleyball aser basketball asayatsü terenemba lir.

Saisapong aser ketdangsür 800 agi iba asayamung nung shilem agidar, koba March 27, 2021 nü tembangtsü.

Iba meet lapokba sentong nung Patton-i, tang Chief Minister Neiphiu Rio-i aniba PDA Sorkari Youth Resources Department ajanga Saisapongtem ajungkettsütsü bendanga

agütsür inyaktüsü aser ibaji ajanga Khelo India kübok sempet tajung alir asayar tasentem ajangzüktüsü. Khelo India-i sobaliba asaya aser saisapong ajungkettsütsü asoshi temulung agüja inyaktüsü, ta ashi.

Ibayongji, India aser International jenjang nung Saisapong tsütsü shilem agitsü asoshi State Sorkari asayatem tali ajungmesor, ta pai shisem.

Asaya aser saisapong ya tasa, tashi aser temulungtetba dak tuluka keta lir asünung, takok angur ka ka akümtsü asoshi saisapong ka dak item sempet den tongtibangsa pei taküm asüngteta aser ajemaluba jakla alitsüla, ta Patton-i telok dang metetdaksü.

Saisapong ka taküm ji temesepba chiyongtsü aser yimya tamajung nungi pilar alitsüla, koba ajanga tawa tanü lanurtem taküm raksatsür, ta pai ashi.

"Naga nung dak Tsüngremi moatsüba sempet keta lir aser yamaji saisapong nunga asenoki dang bendanga agütsüra, asenok shingia memeneptsü. International sabang nunga India tenüng

nungi asen nisungi shilem tulu agiba alimai jangjaa lir aser iba ya maneni tejakleni bener aotsü asoshi lanurtemi meranga inyaktüsü," ta pai ashi.

Iba yimtsüing nung lapokba local ground tasen tashi aoba lenmang yanglutsü asoshi Patton-i sen lakh 15 agütsütsü sangdongogo.

Kasa sentong nung, Minister for Planning and Coordination, Land Revenue and Parliamentary Affairs, Neiba Kronu-i, tawa tanü saisapongtertem ya tongtibang nübu ama alimai züngshir aser ajaki akhümtsübur; saka tajung tsütsü tangari tetshitsüsa, saisapong kaji jakla tajung aketba nisung asütsüla aser yimtsüing nungi tenzüka, state, national aser international jenjang tongteta shilem agitetba asayar ka akümtsüla, ta ashi.

Phek district nungi tang yimsüsüa aliba legislator, Kronu-i Thenyizu local ground tasenba nung gallery tilaka yanglutsü asoshi sen lakh 10 agütsütsü sangdongogo.

Maneni, iba meet lapokba sentong nung PDSA Advisor Colo Mero menden liasü aser meet tenzüktüka Thenyizu Baptist Church, Sannüker, Thepuzhoyi Theyo-i Tsüngremer teyari meshia sarasademtsü. Thenyizu VDB secretary Thepukrayi Nienu-i telok pela agizük aser PDSA president Nezosa Tetseo-i okila jemb. CAGSA president Vekhayi Ruho-i asayamung nung shilem agir ajak pelashishia agizük aser PDSA athletics secretary Chotha Soho-i asayamung nung shilem agitsüpur atema tenangzüktep (oath) ketdangsüa agi, ta sangdong ajanga metetdaksü.



Dimapur, Metsüremi/March 23, 2021: Goa nung March 27 nungi 31, 2021 tashi ayonga asayatsü aliba 24th Junior aser 23rd Sub-Junior National Sepaktakraw Championship nung Nagaland Sepaktakraw Team-i shilem agitsü. Iba asayamung nung shilem agitsüpur tetsür team ji State Sports Girls Academy Dimapur aser tebur team ji Sports Authority of India (SAI) Dimapur nungi lir.

Mixed Skeet Team nung India-i ano gold angu

ISSF SHOOTING WORLD CUP

New Delhi, Metsüremi/ March 23, 2021 (Agencies): Mongolbarnü, ISSF Shooting World Cup - 'Mixed Skeet Team' final asaya nung India nung temeyoktep tarep Angad Vir Singh Bajwa aser Ganemat Sekhon nati shilem tajung agia India atema ano Gold medal ka bendenloktüsügo. Iba final tetoktepba nung tenati Kazakhstan team madak takok angu.

Qualification asaya nung point 141 tashi ngua temaba jenjang tongteter Ganemat aser Angad nati final nung tanaben kasa sempet aser tasa amshia asaya liasü. Gold medal round tetoktepba nung, Ganemat aser Angad nati 33-29 agi Kazakhstan nung tarep Olga Panarina aser Alexandr Yechshenko na tsükdaksü.

Mongolbarnü Ganemat aser Angad nati gold takok anguba densema, tang asaya aliba ISSF Shooting World Cup nung table temaba jenjang

nung alir India team-i gold tenet tashi takok angur alitsü.

Dr. Karni Singh Shooting Range kübok ayongba kasa asayamung nung, India nung tarep Parinaaz Dhaliwal aser Mairaj Ahmad Khan nati tera agi dang gold medal mangu.

Iba round nung Qatar tsür Reem A Sharshani aser Rashid Hamad nati 32-31 agi Parinaaz Dhaliwal aser Mairaj Ahmad Khan tsükdakja bronze medal ajangzüktet.

Arishi küm 19 tain Dhaliwal-i shot ka nung aibelen yongjia, India tsür tarep yagi 'final four shots' nung kanga meranga toktepa asayaago, saka iba shot nung lai aibelen aajanga tenati medal angutsü maongka ajak samadok.

Ano külen, asayamung tasemnübuba nung arishi küm tain Ganemat-i women's skeet tetoktepba nung bronze medal anguba mapang lai linük indang mezüng ISSF World Cup medal takok ngua liasü.

Asian Olympic Qualifiers atema India nung Wrestler pungo shimogo

Lucknow, Metsüremi/ March 23, 2021 (Agencies): Haryana nung Sonam Malik densema India nung wrestler pungo tashi Asian Olympic Qualifying Event aser 2021 Senior Asian Wrestling Championship nung asayatsü maongka nguogo.

Iba asayamung ya

Kazakhstan nung April 9 nungi 18, 2021 tashi ayonga asayatsü.

Sonam dak alaka, iba asayamung nung shilem agitsüpur India nung wrestler pezü ji Seema (50Kg), Anshu Malik (57Kg), Nisha (68Kg) aser Pooja (76Kg) nung alitsü.

Del Potro temekok surgery agitsü

Buenos Aires, Metsüremi/ March 23, 2021 (Agencies): Taoba mapang U.S Open champion Juan Martín del Potro temekok achjilen surgery agitsü, saka Tokyo Olympics nungbo asayatsü teimla lir, ta Hombarnü pai ashi.

2019 küm June ita Queen's Club asayamung mezüng round nung Argentina nung Porto temekok yirua liasü aser iba mapang nungi pai tennis asayamung ka nung danga shilem magii arudar.

Mongolbarnü, Instagram sabang ajanga Porto-i ano Chicago nung temekok surgery agitsü osang lemsatepogo.

"Temekok surgery atema 'conservative therapy'

agidangogo, saka tang tashi temekok ayangba süshia mao. Ni tennis asayaner ta doctor-i metet aser ni Olympics nung shilem aginür, ajiasünung takaratiba nung surgery agiadoktsü lemtet," ta Del Potro-i ashi.

2009 U.S. Open asayamung final nung arishi küm 32 tain Del Potro-i Switzerland nung Roger Federer tsükdakja mezüng Grand Slam title takok angu, saka pa mapang shia yirua dang aliba ajanga pa indang career nung tetsükdaksü jenti adok. Ita 8 atema pai tennis asayamung ka nung danga shilem magii aruogo aser iba ya tan agi pezübenbuba alitsü.

BILEMDANGANG

"Ajaki meranga asemteper, saka kari dang alizüngji tongteter."